

Entrevista cu Alfonso Boekhoudt

Aruba mester duna reconocimento na nos yiunan di tera cu ta mantene nos cultura

ORANJESTAD (AAN): Durante un recorrido DIARIO a topa cu un persona kende su bida ta traha cilinder pa caha di orgel.

Aki nos ta papia di Alfonso Boekhoudt cu aunke no por traha manera antes mas pa motibo di un quebrante di salud, tog ainda ta yuda algun hende cu cilinder pa asina e cultura di caha di orgel no bay perdi.

Den conversacion cu Sr Boekhoudt el a splica cu ta masha problema e tin ultimamente pa loke ta entrada ya cu mirando cu e no por traha mas pa motibo di su malesa el a logra na yega na un ayudo social di parti di gobierno cual awor el a perde tambe siendo cu 30 aña largo el a pidi gobierno trabao pa siña mucha traha caha di orgel y nunca gobierno no a reaccionar.

Ademas tin hopi abusador riba mercado cu ta coy for di cilindernan cu el a traha e musica varia y graba esaki riba



CD y cassette pa asina haci negoshi cune.

Alfonso Boekhoudt ta un persona cu for di tempo cu e tin 22 aña el a siña traha caha di orgel y despues tambe cilinder pa caha di orgel.

Awor ya caba e tin 35 aña

haciendo e trabao aki.

Un di su alumnonan tabata Patan Faro e tempo ey cu awe tambe ta conoci pa tocamento di caha di orgel.

Sr Boekhoudt mes ta biba na Paradera 183 y su lugar di claba cilinder ta bao di e palo

pabao di cas den fresco cu ayudo di su gran amigo Elias Halabi kende sigur lo bira e siguiente trahador di caha di orgel pa Aruba y Curaçao cu ta e lugar for di unda el a bin.

Dia di Himno y bandera tabata algun reaccion caminda a laga sa cierto cos encuan to Himno di Aruba riba CD.

Den e caso aki Sr Boekhoudt a trece dilanti cu aunke e no ta contra, e no tin nada di haber cu Himno riba caha di orgel y mas ainda e no ta traha ningun clase di CD of Casette pa bende riba mercado di Aruba.

Loke e ta haci no ta un negoshi ya cu e no ta biba di dje, pero loke ta tristo si ta e hecho cu siendo handicap e ta haya su mes den contra tiempo unda hasta a kita su unico entrada cu ta Bijstand.

Aruba of gobierno no mester laga hendenan asina un banda y duna nan e balor cu nan merece ya cu si pone e hendenan aki un banda, poco poco nos cultura tambe ta bay perdi.

Ainda gobierno tin tempo pa acerca Alfonso y pa duna Alfonso Boekhoudt un chens pa lage duna nos chikitanan les y evita cu den futuro ningun hende sa mas kico ta loke tabata nos instrumentonan di antes.

Ta na Aruba so bo ta haya cu musica di otro pais ta ser promovi y ningun clase di mandatario ta haci algo pa pone un paro na esaki.

Turistanan ta yega Aruba y ta kere cu ta na nan pais nan ta ya cu e mesun musica cu nan ta scucha na nan pais ta loke nan ta scucha na Aruba tambe.